



Fundasaun Mahein (FM), 30 Abril 2019

Komunikadu Imprensa

Inserteza Jurídiku iha Prolongamentu ba Mandatu CEMG F-FDTL

Desde loron 6 Outobru 2018 kargu CEMG F-FDTL iha situasaun interinidade no ho polêmika durante fulan haat nia laran. To'o loron 8 Feveireu 2019 Prezidente Repúblika Francisco Guterres "Lú Olo" deklara prolonga hikas mandatu Major General Lere Anan Timur ba kargu CEMG F-FDTL ba tinan rua (2019-2020). Maibe FM nia análiza ba deklarasaun Prezidente Repúblika nian hodi prolonga hikas mandatu Major General Lere Anan Timur ba kargu CEMG F-FDTL iha ninia difisiensia jurídika.

Primeiru, La prenxe rekezitu no prosesu nomeasaun normal. Tuir regra ne'ebé estabesele iha Decreto do Governo n.º 6/2016, de 11 de Maio Regimento do Conselho Superior de Defesa Militar prosesu nomeasaun ka prolongamentu no exonerasaun hahu husi membru Governu ne'ebé kompetênsia iha área Defeza ka Ministru Defeza, atu halo audisaun no konsulta uluk ho Konsellu Superior Defeza Militar. Hafoin hetan ona aprovasaun iha Konsellu Superior Defeza Militar maka Ministru Defeza sei hato'o ba Konsellu Ministru atu hetan aprovasaun. Prosesu ikus liu sei hato'o proposta aprovasaun husi Konsellu Ministru ba Prezidente Repúblika atu nomeia tuir dekretu Prezidente no públika iha Jornal da Repúblika.

Los duni katak Prezidente Repúblika maka iha kompetênsia atu nomea ka prolonga no exonera CEMG F-FDTL no la iha limitasaun atu exerse direitu ida ne'e. Maibe prosesu normal ne'ebé estabesele iha Decreto do Governo n.º 6/2016, de 11 de Maio Regimento do Conselho Superior de Defesa Militar, Governu maka tenke hahu ("sob proposta") hanesan parte ida husi prosesu nomeasaun ka prolongamentu no exonerasaun ba CEMG F-FDTL.

Segundu, Prolongamentu ba mandatu CEMG F-FDTL la hala'o tuir Estatutu Militar F-FDTL nian. Normalmente tuir n.º 3 artigu 74 Estatutu Militar F-FDTL mandatu CEMG F-FDTL iha durasaun maxima tinan haat, no bele renova ba dala ida deit. Ida ne'e akontese ona iha mandatu tinan 2011 bainhira nomea Brigadeiro General Lere Anan Timur ba kargu CEMG F-FDTL ho promosaun ba Major General no ramata iha tinan 2015. Portantu iha altura ne'eba Major General Lere Anan Timur seidauk pasa ba idade reforma.

Maibe iha tinan 2015 to'o 2017 Major Gneral Lere Anan Timur pasa ona ba idade reforma no kontinua exerse funsaun iha ierarkia F-FDTL nian tuir alinea d) no e) n.º 2 artigu 195 Estatutu Militar F-FDTL nia haruka. Nune'e prolongamentu ka rekondusaun ba kargu CEMG F-FDTL no nia durasaun la tuir ona mandatu normal

ka ho nia durasaun tinan ida deit no kontinua renova kada tinan tamba Major General Lere Anan Timur pasa ona ba idade reforma (tuir n.º 1 artigu 195 Estatutu Militar F-FDTL nia dispozisaun).

Tamba ne'e, prolongamentu Major General Lere Anan Timur ba kargu CEMG F-FDTL ne'ebé Presidente República prolonga ba tinan rua (2019 – 2020) iha 8 Feveireiru 2019, ne'e la hala'o tuir alinea d) no e) n.º 2 artigu 195 Estatutu Militar F-FDTL nia haruka. Nune'e mos desizaun sira ne'ebé akontese ona iha periodu 2015-2016, 2016-2017 no 2017-2018.

Terseiru, Prolongamentu la ho Dekretu-Presidente República nian no nia públikasaun iha Jornal da República. Tuir prosedementu legal Presidente República nomea ka prolonga no exonera CEMG F-FDTL no kargu sira iha ierarkia F-FDTL nian tenke dekreta tuir Dekretu Presidente República nian no pública iha Jornal da República. Maibe situasaun atual akontese kontrariu ho norma sira ne'ebé estabesele iha Konstitusaun no Lei. Tamba Presidente República prolonga mandatu Major General Lere Anan Timur ba kargu CEMG F-FDTL ba tinan rua (2019 – 2020) hato'o verbal deit liu husi media no la dekreta tuir Dekretu Presidente República nian. Nune'e mos bainhira Dekretu ne'ebé Presidente República dekreta tama iha vigor tenke pública iha Jornal da República.

Rekomendasaun

1. Governu no Presidente República presiza dialogu hodi hetan solusaun serteza ba situasaun ne'e, hodi labele implika fali kargu CEMG F-FDTL nian kontinua iha interinidade no inserteza.
2. Ministériu ba asuntu Defeza ka Ministru Defeza presiza hahu ona prosesu konsulta tuir Decreto do Governo N.º 6/2016, de 11 de Maio Regimento do Conselho Superior de Defesa Militar nia haruka kona-bá prosesu nomeasaun ba kargu CEMG F-FDTL nian. Ikus mai lori ba Konsellu Ministru hodi hetan aprovasaun no hato'o ba Presidente República nomea ka prolonga no exonera tuir kompetênsia Presidente República nian.

Atu hetan informasaun kle'an liu kona-bá asuntu ne'e bele kontaktu:

João Almeida

Acting Director

Email: almeidamahein@gmail.com

Telemovel: (+670) 7756 1184

Website: www.fundasaunmahein.org